

Jodacca ima teppe

Judas

Joda Satiacodenipa ia Medsede Jeso ohuahadeni. Ajijaro ima teppepi Jodana Jesocristodsa toquejenajaridenidsa dsodo inajaro. Pohuadenidsa: –Paji, tabaccoraquuri najarideni tiadeni tocamaidasabaquui-manarana –najari. Poccadeni jeheniji dacoranijine naqui pohuadenidsa dsodo inajaro.

Joda nija najari

¹ ¿Nija ohuemecotedeni? Ohuapi *Joda, Satiaco imecote ojani. Ohuapi Jesocristodsa odsepe ijijaro. Ajijaro ima teppe tiadenidsa dsodo onajaro. Abi Dio tiadenidsa huati huana tadsapa tiadeni huahua tabaquijari, Jesocristodsa tiquejenanijine. Jesocristopa tiadeni Cacahuade tojajari. ²Diopa tiadenidsa bica dsanapona. Pocca jonehe, pocca tohuati huanehe naqui denima tiadenidsa tojadsanapona, onajaro.

Maidsehe mamaride tahimarideni

2 Pedrocca 2.1-7

³Ohuemecotedeni, titohuideni ohuati huana tani. Jesocristocca tossiejehe ia huapimadsa da inaridsajaro tahimarini tiadenidsa dsodode jipa onaraha ima onihi anidsapi najaro imara tiadenidsa dsodo onajaro. Dio pocca marinaja pajissacca iadsa da inajaropi nema dsanaponitohui. Najarodsa icassiejeranijine. Aji Jesocristodsa iquejenajaropi najaro marinajadsa

pajissa inajaro. Najaro marinaja tecahuamananissa taji. Najarodsa ima onihi inaharinijine bica tejerani. Madijajine cacajiquimerajeranijine dacoraquuri tiquinadsa poni tiquinaji, onajaro. ⁴Ohuatti nema onajaropi ssamoquuri tiquinaraha madija tiadenidsa jai tojedsimajaripa pina titessedenissa quinaraha tiadeni tocamaidasabaquimanajari. Najaridenipa tabaccoraquuri najari. Attidenipa: –Diopa iadsa huati huana tahi. Icca tabaccorehe manaconi ia tonajidso-baquui-jarahitohui. Ia tohuini inanicca inanani oppinera tani –quiquinanajari. Najaridenipa ia Maride, ia Medsede Jesocristo ojari najaridsa huattajoquuri najari. Diopa najaridenidsa najidsohue oppina tanicca inanajorajaro. Najaro imapi maittaccadsama Dio Atti dsodo napojarodsa dsodo quinarajaro.

⁵Diopa pajissa madija inajidso-baquui tahi nahatoquuri tiquinaporaha tibodideni huatoma-mananijine tiadenidsa huati onapomajaro. Maittaccadsama *Isaraeri potemahidenipa dsama Ejitocca

madijadenijine nanajidso toquejena-dsanaporaha ia Medsede Dio idinibaquidisa dsama onihihuaji iaccanibaquijari. Naraha dsotode potemahideni motapa: –Pajissa, Diopa ia Cacahuade –quina-jaradsa Dio Pohuana inajicabaquijari quinade. ⁶Dio pocca dodosse tabaqqi memehuajicca mota naco pocca najidsohue tonahanamanajari quinade. Tahide Dio Pohua inoridsa huapima madimandsapa cacahuehe cajimanapojari. Naraha motadenipa poccadeni cacahuehe Diocca danijiraha pohuadenidsa pina ponimassa nadsa inebomanajaro. Nadsapa Dio Pohuajine cadenadsa bijideni jore naha dsidsini oppinabotedsa madimanajari. Nama dsanapomanadsapa nidsa *madija huapimacca ima cattermanijinecca huada bacco toquinahijine. Nadsana najidsohue denima oppina tanicca cajimanahitohui. ⁷Najaro imassa najaro naqui odsa panani *Sodomacca madija, Comoracca madija, nahi huajira tanicca odsa panani bedeni caji taridsajarocca madija huapimapa tabaccoraqquri najari. Huananehe onihi onihidsa disseraqquri najari. Huananehe jidsa, oppina tanicca naqui inanamanajaro. Nama quinadsapa Diojine jororoni jicaquera taniccahuaji madimanajari. Poccadeni imadsapi dsotodedenicca bodideni natomanahijine. –Paji, iadsa naco nama narana –quinahijine, onajaro.

⁸Diocca najidsohue madija imasiri tonanamanajaridenidsa ssonarini ahuato taraha tiadenidsa jai tojedsimajaridenipa nama naha poccadeni tabaccorehedsa

disseraqquri najari. Pohuadenipa: –Icca huadadsa qqui inajarossa inanani bica tani –quiquinanadsa najarossa inanamanajaro. Poccadeni huananehe, poccadeni tabaccorehe onihi onihidsa pohuadeni assire inatabaccoramanajaro. Ia Medsede Diodsa, pocca dossenijidsa naco huattajoqquri najari. Diocca dodosse tabaqqi memehuajicadsa naco tatamasso quiquinanajari. ⁹Naraha Diocca dodosse tabaqquidenicca tamine Miqueopa nama najarahi. Maittaccadsama Moisesi dsoqueedsa Diocca huadi Satanapa Moisesi assire accone Miqueo tedseje cahadiredsapa ahuaji huati, ahuaji huati quinanajari. Naraha Miqueopa Dio noppine cappinadsa Satanadsa tatamasso najarajari. Pohua atti ajima najarora huati tajari: –Ohua Medsede Diona tia najidsohuitohui –najari nade Miqueo. ¹⁰Naraha mamaisadenipa ima mittamanahissa tajaradsapa najaro imadsa attideni tabaccora tadsa atti quinajari. Pina banidenissa quinajari. Bodideni huatohuijine ssaqquri nadsa pohuadeni tohuini quinahicca tohuira disseraqquri najari. Najarojinena pohua pohuadeni tonatabaccoramanajari.

¹¹¡Jaho, najaridenipa huahuattajo toquejenahitohui! Pohuadenipa pina maittaccadsama Cainocca ima tabaccora tapojarossa inanamanajaro. Dsinirotohui naco disseraqquri nadsapa pina maittaccadsamacca Dio Atti cacomerabote Baramissa quinajari. Poccadeni ibohuejine pina maittaccadsama Core pocca madijama jicapojarissa quinahitohui.

¹²Timecotedeni tedseje teti-deni cahanerara canadsa titijipa-qquimana naraha tiadenidsa mamaiadsadedeni quejemamana-dsapa pohuama huatidsede, jipade, dsede tohuira quinajari. Diosda cappineraququiri, tiadenidsa cappineraququiri nadsapa pohuadenijine ticomehimanajaro. Pohuadenipa pohuadenidsara bodideni huatohui ojari najari. Pina meme essenii passo ccani jirehe jojodejine ponima toqqequirimajarossa, pina ahua bononora tajarissa quinajari. Pohua bonohuicca abadsico bacco tocanaraha bono-jarajaripa huatiararissa najari. Pina jaboma dsoppa jeo nadsa huatiararissa quinajari.

¹³Pohuadenipa coridsa imenicca passo jojodejine jadsirema ssoda ssoda najarossa quinajari. Poccadeni tabaccorehepi pina ssabojani ssiquihuaji tojadsa ahuaato tajarossa najaro. Pohuadenipa pina abadsico bedi jano tocajadsa dsidsini oppina tanihuaji tocajararissa dsanapomanajari.

¹⁴Maittaccadsama Adana potemahi 7'cca *Enoco naco Djojine mamaiadsadedeni tahimari huati tapojari. Pohua attipa:

—¡Ticattomama canaji! Ia Medsede pocca dodosse tabaqqi memehujicca sibema pohuadsa jahironahi qqii onahi. ¹⁵Pohuapa madija huapimacca ima cattemade tojahijine ccaronajari. Huapima tabaccoraququiri najaridenicca imasiri manaconi pohuadenidsa najidsohue inassonarinitohui. Aja Dio Pohuadsa attideni tabaccora taniccadsa atti atti quinajari manaconipi ia Medsede inajidso-baqqiहितohui —nahi nade Enoco.

¹⁶Mamaiadsadedenipa huapima pohuadenidsa ocassera tadsapa atti atti nanaridsamana najari. Madijadsa naco ssamoni hua quinaja naridsapohui najari. Attideni dacoradsa pohuadeni deni totonanamana najari. Pohuadeni tohuini quinahicca tohuira mamadimana najari. Tohui quinahicca cajimanahijinepa madijadsa attideni bica tadsa huati huati toquinadsa pohuadenidsa totoja najaro.

Jodacca marinaja jehe quinajaridenidsa

¹⁷Naraha tiadenipi pina mamaiadsadedenissa tiquinejerani. Ohuemecotedeni, titohuideni ohuati huana tani. Aja ia Medsede Jesocristocca dodosse tabaqqi tiadenidsa huati toquinapohuicca tetideni ajima tejerana. ¹⁸Attidenipa: —Dsama jicabote nadsapi madija attideni tabaccora taniccadsa jijidsade caji tahitohui. Najaridenipa tabaccorehe tohuira madi-manahitohui —quinade tiadenidsa. ¹⁹Najaridenijine ticahadirere cananitohui. Pohuadeni tohuini quinahicca tabaccorehe tohuinira bodideni huahuato najari. Pohuadenipa Dio Corime cappiramanaja najari.

²⁰Naraha tiadenipi nema tiquinejeraji. Ohuemecotedeni, titohuideni ohuati huana tani. Dacoraququiri toquinadsa ticcadeni jeheniji bicani poniradsa disseraququiri toquinaji. Dio Corime tibodideni acco camadsa Diodsa huati huati tiquinana nana, onajaro. ²¹Diocca tohuati huanehema tiadeni tecahuamannissa tana. Ia Medsede Jesocristopa itohui huati cahanari canadsa iadsa camittehe jiquejeranicca

da inanitohui. Najaro ima tohuira timadimana-dsanapoji, onajaro.

²²Timecotedenicca jeheniji japari tajarodenidsa tetideni huanacquiri nana. Bodideni acco ticamabaquimanadsapa poccadeni jeheniji todacorani nanijine. ²³Madija ohuahadeni najidsohue jiquejera-nihuaji toquejenaraha tocassiejera-hijine acco ticamabaquimanajo. Pina dsippo jororo cananidsa madija ssonidsanaraha tidimoranimanadsapa dsori tinanamanajarissa tiquinaji. Madija ohuahadeni naco poccadeni tabaccoreheda disseraqquri nadsapa ticcadeni tohuati huanehema acco ticamabaquimanana. Naraha paji, poccadeni tabaccorehe tiadenidsa dsapa tejeranijine tiadeni tecahuamananissa tana. Poccadeni tabaccoreheda jiperaqquri tiquinaji, onajaro.

**Jodapa jicanicca dsodode
tojadsapa Diodsa huatidsejari**

²⁴Diopa pajirahi. Icca jeheniji tossamo-geranijine ia tohuacahuabaquid-sanapojari. Poccadacorehejine Pohua ssiejene bica-botedsa huireqquri inehe idomo huadsapi huatidsehe imeni icajinitohui.

²⁵Nema nadsapi ia Tonassijade Diodsa etidsena. Diopa ojarihi. Ohuaha nohuerahi. Ia Medsede Jesocristojine icassiejaropaji. Dio Pohuadsa: –Icca Tamine bicabote deni tijani, daco tijirani –inajaro. –Huapima Dossede tijajaro. Tiapi tahidedsama nema tajonajaroa jidapana nema tani paji nani. Nema tidsanaponitohui –inajaro Diodsa. Pajissa nema nana. Epejeni.